

道光六年重修

中州貞紉菴纂輯

太原縣志

本署藏板

太原縣志卷之五

名宦

晉陽多名宦董安于尹鐸尚矣漢唐以來史不絕書或以德著或以才顯要皆不愧其名者也志名宦

周

董安于趙氏臣治晉陽公宮之垣皆以荻蒿苦楚牆之高至丈餘室皆鍊銅爲柱質後智伯率韓魏伐趙襄子適晉陽發而用之三國之兵乘城而戰三月不能拔卒敗智伯軍

尹鐸趙氏臣簡子使爲晉陽請曰繭絲乎保障乎簡子曰

太原縣志

卷之五

名宦

一

保障哉鐸損其戶數簡子誠襄子曰晉國有難而無以尹鐸爲少無以晉陽爲遠必以爲歸及智伯伐趙襄子乃走晉陽智伯圍而灌之沉竈產鼃民無畔意

張孟談趙襄子之相也智伯結韓魏以伐趙圍晉陽三年決晉水而灌之城中沉竈產鼃糧匱力盡士卒病羸襄子欲降張孟談曰亡不能存危不能安則無爲貴智士也乃見韓魏之君陰約三軍與之期以報襄子襄子再拜之張孟談朝智伯而出遇智過於轅門之外智過入見智伯曰韓魏殆將有變曰何故對曰臣遇張孟談於轅門之外其志矜其行高智伯曰不然吾與二主約

矣子釋之勿出於口智過出見二主人謂智伯曰二主色動而意變必背君不如殺之智伯不可智過曰不殺則遂親之亦弗能用也張孟談聞之入見襄子曰臣遇智過於轅門之外其視有疑臣之心入見智伯出更其姓今暮不擊必後之矣乃與韓魏約夜殺守堤之吏而決水灌智伯軍襄子將卒犯其前韓魏翼而擊之遂滅智氏

郟辛魏大夫治晉陽道不拾遺

晉

劉琨魏昌人漢中山靖王之後初在晉陽爲敵騎所圍城

太原縣志

卷之五

名宦

二

中窘迫琨乃乘月登樓清嘯敵兵聞之皆淒然懷土棄圍而去嘗展築晉陽東城與劉曜戰志在雪恥立功翼戴晉室後遇害民咸思德立祠祀之追贈太尉諡曰愍

隋

辛公義狄道人開皇中爲并州刺史下車先至獄中露坐驗問獄囚十餘日斷決殆盡方還受訟皆不立文案訊問不盡應須禁者公義卽宿廳事或諫曰君何自苦也答曰刺史無德令百姓繫於囹圄豈有禁人在獄而心自安乎罪人聞之咸自嘆服後訟者多兩讓而止

張祥京兆人并州司馬時漢王諒反遣將劉建功縱火燒

其郭祥於城西王母廟再拜泣禱曰百姓何罪致此焚燒神其有靈可降雨相救言訖雨降火遂滅士卒感其至誠莫不用命賊退以功授開府

唐

劉文靜字肇仁京兆武功人大業末爲晉陽令與晉陽宮監裴寂善唐公鎮太原深自結託後坐李密姻屬繫獄秦王入禁所視之文靜曰太原百姓避盜者皆入此城文靜爲令數年知其豪傑可得十萬人尊公所領兵復且數萬君言出口誰敢不從秦王笑曰君言正合吾意文靜遂介寂以交唐公義兵起奉命使突厥突厥卽遣

太原縣志

卷之五

名宦

三

二千騎隨文靜至又獻馬千匹唐公喜曰非君何以致之以功封魯國公後拜民部尙書爲寂構害

李世勣字懋功曹州人本姓徐爲并州大都督府長史封英國公在并十六年令行禁止號爲稱職嘗築晉陽城引晉水駕汾入城以資民用累拜尙書左僕射卒贈太尉諡貞武

崔神慶義元次子舉明經則天時拜并州長史到州有豪富僞作改錢文勅文書下州穀麥涌貴百姓驚擾神慶執奏以爲不便下制褒賞之先是并州有東西二城隔汾水神慶始築城相接每歲省防禦兵數千人

李義琰昌樂人登進士授太原尉都督李世勣嚴肅僚吏
憚之獨義琰庭辨曲直不少挫勣甚禮焉

富嘉謨雍州武功人舉進士長安中爲晉陽尉與同官吳
少微友善先是撰碑頌皆以徐庾爲宗嘉謨與少微屬
詞皆以經典爲本時人欽慕文體一變稱富吳體長史
張仁亶重之待以殊禮

吳少微新安人舉進士長安中官晉陽尉長史張仁亶重
之嘗爲撰進九鼎銘表

谷倚魏郡人長安中官太原主簿以文詞著名與富嘉謨
吳少微時稱北京三傑

太原縣志

卷之五

名宦

四

李暲淮安王神通元孫開元中爲太原尹太原舊俗有僧
徒以習禪爲業死則以屍送近郊以飼鳥獸如是積年
土人號其地爲黃坑暲到官申明禮憲期不再犯其風
遂革

裴寬開元時爲太原尹明皇帝餞寬詩云德比代雲布心
如晉水清

宋

王素字仲儀莘人太尉旦季子舉進士熙寧初以端明殿
學士知太原府汾河大溢素曰若壞平晉遂灌州城矣
亟命具舟楫築堤以塹之一夕水驟至人賴以安人知

通政銀臺司致仕卒諡懿敏

陳知白爲太原尉分引晉水灌田民用大饒

郭京嘉祐中爲太原尉時因水加賦水流及田民懼不敢用公爲設法咸受其利

金

盧孝儉宣德州人登天眷二年第累官太原少尹大定二年陝西用兵尚書省發本路稅粟赴平涼充軍實期甚嚴迫孝儉輒易以金帛馳至平涼用省而不失期并人稱之

明

太原縣志

卷之五

名宦

五

潘原英山東歷城人洪武初令改築城池重葺廟學雅善課士當兵戈凋殘之際興賢育才絃誦不輟

郝瑾邯鄲監生永樂中令有惠政秩滿去人思慕之

藺從善河南磁州舉人永樂間任教諭博學工文造士寬嚴有方退仍手一卷諷詠後累官翰林學士

劉敏直隸大興舉人正統間令修葺城垣濬鑿濠塹練習吏事行寬於嚴擢太原府同知

鄭瑾新安舉人正統間教諭陞國子監典籍

黃綱南陽舉人成化間以盱眙訓導陞靈石教諭補任太原陝西山西鄉試充同考官

李曜蠡縣舉人宏治間令重修公署濬濠栽樹多政蹟
劉經直隸宛平舉人宏治間令性坦直政尙和平前令劉
敏以嚴有聲經以寬繼之時稱濟美擢監察御史

張馨朝邑監生宏治間以萬泉訓導陞太原教諭訓士謹
嚴著作精工陞遼東都司教諭

申綸永樂年進士正德間以平陸調太原縣度量寬宏爲
政持大體期年陞潞州知州官至按察司副使

王堯卿招遠監生嘉靖初任太原教諭待士以誠咸服其
教後八年致仕

張天憲直隸高苑監生嘉靖間縣丞性廉潔泣事明敏待

太原縣志

卷之五

名宦

六

人以誠邑賦舊多逋欠天憲示以期輸者雲集後以前
任安化事罷

金礪字霜鐔河南西華進士嘉靖間令仁明能悉民隱舊
造夏秋赤歷里書索費不貲計事給食歲省五百餘金
水利歲久壅淤相其高下開新渠四十餘道溉田數百
頃邵姚等都逃亡者過半給以籽種緩其徭役復業者
千餘家又加意學校躬校閱賑貧乏鼓舞備至初泣任
卽製戎器火具簡閱訓練爲百年計後遇敵竟以有備
得免尋調汾陽父老爭走部乞畱已復調陽曲涕泣攀
臥車累日不得發陽城賈贈有文紀之有祠在西門外

今廢

潘縉字朝紳陝西臨洮貢生嘉靖間主簿遇歲凶民朝夕不給而追呼者不止抗顏與爭竟得釋有婦抱子詣公庭懇冤累日無所得食將就斃給以資斧隆冬有赤體者捐俸買花布昇之災黎無告待以舉火者數千指甫七閱月奉檄督逋賦不欲鞭扑窮民以博上官寵遂解組去邑人尸祝之

屈鍾嶽字毓秀蒲城舉人萬歷間任清慎敏捷有循吏聲擢光祿署正遷北部郎擢大同知府未幾卒鍾嶽有豁達度正直不阿旅櫬歸里行李蕭然

太原縣志

卷之五

名宦

七

張任學安岳人天啟五年進士知太原縣崇禎四年舉治行卓異入爲御史後請易武階改河南總兵官

國朝

郜煥元字凌玉長垣進士順治四年令補葺城垣悉埤以磚會姜瓖入寇多方備禦賊不能拔詳見金之俊紀功碑

孫閔達字遜菴江南通州進士康熙十三年任性簡潔食不重味政先慈恕不輕敲扑犯者至死胥感頌不輟立義學刊省身錄功過格感應篇後以病歸行李一如始至

殷嶧江南天長拔貢康熙五十九年任振興文教廉惠愛民

沈繼賢浙江海寧進士雍正九年任重修縣志作養人才嘉獎善類有政聲

錢標武進拔貢雍正十一年任有政聲歲荒悉心賑恤全活甚衆修學宮植土類諸生貧苦者資給之於河渠利民諸事尤拳拳焉擢知朔州病卒貧無以斂邑人爭賻贈以歸

徐玉田江西南昌進士乾隆九年任居官清正民心愛戴嘗懸見心堂額於大堂以明志

太原縣志

卷之五

名宦

八

梁卿雲直隸安州進士乾隆十一年任廉鯁執法豪猾斂迹濬引汾河復歸故道後陞廣東連平州知州士民思之乃於城隍廟左立祠奉祀每年於三月初四日致祭焉

陳詔雲南楚雄舉人乾隆十九年任政簡風清愛民如子乾隆二十年劉文正公清查虧空適公有挪移未補銀三千餘兩士民恐公得罪一夜間卽代爲補足文正公大爲嘉獎後陞山東青州府知府

江二儀江蘇元和舉人乾隆三十一年任緝盜安民清理詞訟補修縣城百姓至今思之

轍臣滿洲鑲白旗人乾隆四十一年由歸化城理事同知攝理邑事補築護城石堰以禦風峪之水城賴以安王鴻謨直隸雄縣舉人乾隆五十年任剛毅果斷清廉愛民至今猶思其德

按舊志名宦中列陳泰段韶韋濟嚴浚李銳崔洪禮張憲明鎬李若谷韓琦薛映滕甫范純仁范純禮皆統轄全郡之官宜人郡志繫之一邑非其實矣惟張孟談劉琨辛公義張祥李世勣崔神慶李暉裴寬王素盧孝儉陳知白郭京雖非邑令而澤在茲土百姓至今不忘故仍錄於篇郟辛劉文靜實治是邑而舊志不載今補入